

## Katika Nyua za Mbinguni,

*Naye, kwa sababu hii, aweza kuwaokoa kabisa wao wamjiao Mungu kwa yeye; maana juu hai siku zote ili awaombe. Waebrania 7:25.*

**M**kombozi wa ulimwengu anayo nguvu ya kuwavuta watu Kwake, kutuliza hofu zao, kuondoa huzuni zao, kuwatia moyo kwa tumaini na ujasiri, kuwasaidia waweze kuamini uhiari wa Mungu kuwapokea kupitia kwa ustahili wa Mbadala wa kiungu. Kama walengwa wa upendo wa Mungu tunapaswa daima kushukuru kwamba tunaye mpatanishi, mtetezi na mwombezi katika nyua za mbinguni, anayesihia kwa niaba yetu mbele za Baba.

Tunacho kila ambacho tungehitaji kutupatia msukumo wa imani na kumtumaini Mungu. Katika tawala za kidunia, mfalme anapotoa ahadi yake kubwa kabisa ili kuwahakikishia watu ukweli wa ahadi hiyo, anamtoa mwanawe kuwa mateka, ambaye atakombolewa katika utimizwaji wa ahadi yake; hebu tazama ahadi ya uaminifu wa Baba, kwani alipotaka kuwahakikishia watu kuwa baraza Lake halina kigeugeu, alimtoa Mwana Wake wa pekee kuja ulimwenguni, kuchukua asili ya mwanadamu, siyo tu kwa miaka kadhaa ya maisha yake, lakini pia kudumisha asili hiyo ya kibinadamu katika nyua za mbinguni, ahadi ya milele ya uaminifu wa Mungu. Ni cha ajabu kiasi gani kina cha utajiri wa hekima na upendo wa Mungu!

Kupitia kwa kumwamini Kristo tunakuwa washirika wa familia ya kifalme, warithi wa Mungu na warithi pamoja na Kristo. Tu wamoja ndani ya Kristo. Tunapotazama Kalvari na kumwona Anayeteswa ni wa jamii ya kifalme ambaye akiwa na asili ya mwanadamu alibeba laana ya sheria kwa niaba ya mwanadamu, tofauti zote za kitaifa, tofauti za kimadhehebu zinafutuliwa mbali; heshima zote zitokanazo na cheo, viburi vyote vya hadhi ya kimatabaka vitapotea.

Nuru inayoangaza daima katika msalaba wa Kalvari ikitoka katika kiti cha enzi cha Mungu inakomesha utengano wa kibinadamu unaotokana na tofauti za kitabaka au rangi. Watu wa tabaka zote wanakuwa washirika wa familia moja, watoto wa Mfalme wa mbinguni, si kwa njia za mamlaka za kiduniani, bali kupitia kwa upendo wa Mungu aliyemtoa Yesu apitie maisha ya umaskini, mateso na fedheha, hadi kifo cha aibu na maumivu makali, ili aweze kuwaleta watoto wengi wa kiume na wa kike katika utukufu.

Wala si cheo, wala hekima yenye ukomo, wala sifa, wala uwezo wa asili wa mtu vinavyomfanya Mungu amweke mtu katika daraja la juu. Uwezo wa kiakili, kimantiki, vipaji vya wanadamu ni karama za Mungu zinazopaswa kutumika kwa utukufu Wake, kwa ajili ya kujenga ufalme Wake wa milele. Tabia ya kiroho na kimaadili ndiyo yenye thamani katika mtazamo wa kimbingu na ndiyo itashinda mauti na kufanywa kuwayenye utukufu kwa kupewa hali ya kutokufa kwa ajili ya zama zisizo na ukomo za umilele... Wale tu waliothamini neema ya Kristo, iliyowafanya kuwa warithi wa Mungu na warithi pamoja na Yesu ndio watafufuka kutoka makaburini wakiwa wamebeba picha ya Mkombozi wao

(Selected Messages 1:258, 259).